



六朝事迹編類
三

ル 5
1193
3



1193 3
1193 3

六朝事迹編類卷之六

左奉議郎充江南東路安撫司幹辦公事張敦頤養正撰

山岡門

石碗山 碗牛委切

輿地志云秦始皇時望氣者云江東有天子氣乃東遊以厭之又鑿金陵以斷其勢今方山石碗是其所斷之地也孫盛云東至方山有直瀆自瀆至此山或云是秦時所掘山今方山西九里有大龍枕淮合壟悉是石名石碗京師溝塘累石悉鑿此壟取之在城東南四十五里

天闕山

晉元帝即位起宮殿城闕郭璞云闕不便王導乃



指牛頭山爲天闕揚修之有詩云牛頭天際碧凝
嵐王導無稽示妄談若指遠山爲上闕長安應合
指終南

鳳臺山

宋元嘉中鳳凰集於是山乃築臺於山椒以旌嘉
瑞在府城西南二里今保寧寺是也唐李白詩曰
置酒延落景金陵鳳凰臺長波瀉萬古心與雲俱
開昔時有鳳凰鳳凰爲誰來鳳凰去已久正當今
日回明君越羲軒天老坐三台豪士無所用彈琴
醉金罍東風吹山花安可不盡杯六帝沒幽草深
宮冥綠苔置酒勿復道歌鐘但相催又詩曰鳳凰
臺上鳳凰遊鳳去臺空江自流吳時花草埋幽徑

真武觀故也晉北郊壇宋藥園壘樂遊苑冰井甘
露亭皆在此山

幕府山

寰宇記云在城西北二十里周回三十里高七十
丈東北臨直瀆浦西接寶林山南接蟹浦輿地志
云臨沂縣東八里有幕府山寰宇記云晉元帝自
廣陵渡江建康城荒落以府第居縣北山下因以
幕府山爲名圖經云丞相王導建幕府於此山因
名之山上有虎跑蒲包切泉其西巔有仙人臺宋
明帝高寧陵在山西王導溫嶠亦葬山西又按寰
宇記云陳武帝破北齊軍四十六萬於幕府山下
至後主禎明中嘗幸此山校獵虞世南獻賦以美

之楊修之有詩云六代繁華一瞬間平蕪遠樹不
勝閒倚樓天暝雲如幕知是琅琊幕府山

雞籠山

寰宇記云在城西北九里西接落星澗北臨棲立
塘輿地志云雞籠山在覆舟山之西二百餘步其
狀如雞籠因以為名按宋文帝元嘉十五年立儒
館於北郊命雷次宗居之次宗因開館於雞籠山
齊高帝嘗就次宗受禮及左氏春秋又竟陵王子
良嘗移居雞籠山下集四學士鈔五經百家為四
部要略千卷又按宋文帝元嘉中改為龍山以黑
龍嘗見真武湖此山正臨湖上因以為名令去縣
六里晉元帝明帝成帝哀帝四陵皆在山南中有

晉代衣冠成古丘三山半落青天外二水中分白
鷺洲總為浮雲能蔽日長安不見使人愁南唐宋
齊丘有詩云嵯峨壓洪泉峯峯撐碧落宜哉秦始皇
皇不驅亦不鑿上有布政臺八顧皆城郭山感龍
虎健水黑螭蜃作白虹欲吞人赤驥相搏掣畫棟
泥金碧石路盤繞确倒挂哭月猿危立思天鶴鑿
池養蛟龍栽桐棲鸞鷲梁間燕教雛石罅蛇縣殼
養花如養賢去草如去惡日晚嚴城鼓風來蕭寺
鐸掃地驅塵埃翦蒿除鳥雀金桃帶葉摘綠李和
衣嚼貞竹無盛衰媚柳先搖落塵飛景陽井草合
臨春閣芙蓉如佳人回首似調謔當軒有直道無
人肯駐腳夜半鼠勃窣天陰鬼敲鉢松孤不易立

石醜難安著自憐啄木鳥去蠹終不錯晚風吹梧
桐樹頭鳴曝曝我我江令石青苔何淡薄不話興
亾事舉首思眇邈吁哉未到此褊劣同尺蠖籠鶴
羨鳧毛猛虎愛蝸角一日賢太守與我觀橐籥往
往獨自語天帝相唯諾風雲偶不來寰宇銷一略
我欲烹長鯨四海爲鼎鑊我欲取大鵬天地爲繒
繳音勺也絲安得生羽翰雄飛上寥廓其詩刻今在
保寧寺

覆舟山

寰宇記云在城北五里周回三里高三十一丈東
接青溪北臨真武湖狀如覆舟因以爲名輿地志
云宋元嘉中改名真武山以其臨真武湖山復有

寶章閣藏版

佛寺五所

方山

寰宇記云山高一百一十六丈周回二十七里圖
經云四面方如城東南有水下注長塘流旣平陸
又按輿地志云湖孰西北有方山頂正方上有池
水山謙之丹陽記曰山形方如印故曰方山亦名
天印山秦始皇鑿金陵此山是其斷處文選謝靈
運東出鄉里相送至方山靈運嘗賦詩其略云解
纜及流潮懷舊不能發又按南史宋何尚之爲尚
書令元嘉末致仕於方山著退居賦以明所守議
者咸謂尚之不能固志後果然又按齊武帝嘗幸
方山顧左右曰朕欲經始山之南復爲離宮期勝

新林苑徐孝嗣答曰繞黃山款牛首乃盛漢之事
今江南未廣願少留神乃止圖經謂齊武帝於方
山築苑不知何所據而云今在城東南四十五里

攝山

寰宇記云周回四十里高一百三十二丈東運畫
石山南接落星山陳江總攝山棲霞寺碑文云南
徐州琅琊郡江乘縣有攝山其狀似繖亦名繖山
尹先生記云山多草藥可以攝養故以攝為名南
史齊明僧紹住江乘攝山今棲霞寺即其宅也今
去城四十五里

東山

上元縣有兩東山一在崇禮鄉今土山是也晉書

寶章閣藏版

謝安寓居會稽棲遲東山此安之舊隱也後於土
山營築以擬東山今去縣二十里一在鍾山鄉蔣
廟東北宋劉劭隱居之地南史劭嘗經始鍾嶺以
為棲息及造園宅名為東山今去縣十五里陳軒
金陵集載李白李建勳東山詩皆指土山而作

白山

圖經云舊屬江乘縣周回八里高八十丈東接竹
堂山南接蔣山北連攝山西有水下注平陸輿地
志云階礎碑石悉出此山南史梁散騎常侍韋載
有田十餘頃在江乘縣之白山天嘉元年遂築室
而居屏絕人事不入籬門者十載今去縣二十里

湯山

寰宇記云在縣東北其西接雲穴山山不甚高無大林木有湯泉出其下大小凡六處湯礪繞其東南四時常熱禽鳥之類入之輒爛以煮豆穀終日不熟草木濯之轉見鮮茂舊有湯泉館今廢去縣五十里

大壯觀山

圖經云在城北一十八里周回五里高二十丈東連蔣山西有水下注平陸南臨真武湖北臨蠡湖舊經謂陳宣帝起大壯觀於此山因以爲名南史宣帝太建十一年八月幸大壯觀因大閱武命都督任忠領步騎十萬陣於真武湖上登真武門觀宴羣臣因幸樂遊設絲竹之會仍重幸大壯觀振

寶章閣藏版

旅而還

臨沂山

圖經云在城東北四十里周回三十里高四十丈東北接落星山西臨大江西南有舊臨沂縣城

祈澤山

舊經云初法師嘗結茅於此有龍女來聽講既而神泉涌於講座下後遂爲祈禱水旱之所山因此得名高五十丈周回十里東連彭城山北連青龍山今去縣二十三里

盧龍山

圖經云在城西北十六里周回五里高三十六丈東有水下注平陸西臨大江舊經云晉元帝初渡

江到此見山嶺縣延遠接石頭真江上之關塞以
比北地盧龍山因以為名

馬鞍山

圖經云以形似得名西臨大江東與石頭城相接
南史陳後主禎明三年隋將濟江宜黃侯慧紀自
荊州帥將士沿江而下欲趨臺城遣南康太守魯
肅將兵以鐵鎖橫江隋將楊素奮兵擊之爭馬鞍
山四十餘戰隋軍死者五千餘人今去城十里

大城山

圖經云周回二十二里高八十二丈南接符堅山
西接鴈門山北接竹堂山今去城七十里

望祭山

寶章閣藏版

東晉成帝於北郊以白山鍾山配四十四神之數
兼祭之按通典梁武帝省四望座惟鍾山及松江
浙江五湖白石山竝存之

絳巖山

圖經云在句容縣西南三十里周回二十四里高
一百六十五丈上有龍坑祠壇江南地志云漢丹
陽縣北有赭山其土赤因為郡名本名赤山唐天
寶六年改名絳巖山

竹里山

圖經云在句容縣方輿地記云行者以其途傾險
號曰翻車峴鮑昭有行翻車峴詩即此山也

濁山

圖經云在溧水縣東南十里高一十丈周回五里
山北濁水出焉輿地志云溧水縣有濁山下有濁
水即秦淮之源也

東廬山

圖經云在溧水縣東南一十五里高六十八丈周
回二十里有三水源一出山西流入秦淮一自山
東北流入馬沈港一自山東南吳漕流入丹陽湖
丹陽記云溧水縣東有廬山與丹陽分界俗傳云
以廬舍爲名又云嚴子陵嘗結廬於此

大巫山

圖經云在溧陽縣北四十五里周回二百五十步
高八丈長塘湖內接鎮江府金壇縣界

寶章閣藏版

小巫山

圖經云在溧陽縣東北二十五里周回四里高五
丈長塘湖內石上有獸跡

平陵山

圖經云在溧陽縣西北三十五里高三丈周回三
里晉書云咸和四年李閔斬韓晃蘇逸於此

鐵冶山

圖經云在溧陽縣西南七十里周回二十里高一
百八十丈輿地志云前代鐵冶處

白土岡

圖經云北連蔣山其土色白因名之輿地志云同
夏縣西有白土塹即此地按北史隋賀若弼嘗破

陳軍於蔣山之白土岡今蔣山西北有岡壟土色正白乃其地圖經云在縣東二十二里非是蓋同夏縣在今縣東十五里而白土岡在同夏之西不應有二十二里之遠也

白楊路

圖經云縣南十二里石岡之橫道是也六朝雜事云宋袁粲常酌於此忽逢村父便留連笑語人怪而問之答曰吾侶偶遇非知音也楊修之有詩云殘枝敗葉幾露春莫問栽培迹已陳細雨斜風馬無力蕭蕭滿路更愁人

千佛嶺

在攝山棲霞寺之側按江總棲霞寺碑明僧紹居

寶章閣藏版

士子仲璋爲臨沂令於西峯石壁與度禪師鑄造無量壽佛大同二年龕頂放光齊文惠太子豫章文獻王竟陵文宣王始安王及宋江夏王霍姬齊田奐等琢石建像梁臨川靖惠王復加瑩飾嶺之中道石壁有沈傳師徐鉉張稚圭王雱題名

謝安墩

在羊山報寧寺之後基址尚存謝安與王羲之嘗登此超然有高世之志李太白將營園其上乃作詩曰晉室昔橫潰永嘉遂南奔沙塵何茫茫龍虎鬪朝昏胡馬風漢草天驕蹙中原哲匠感頽運雲屏忽飛翻組練照楚國旌旗連海門西塞百萬衆戈甲如雲屯投鞭可填江一掃不足論皇運有返

正醜虜無遺魂談笑遏橫流蒼生望斯存冷城訪
古跡猶有謝安墩憑覽周地險高標絕人喧想像
東山姿緬懷右軍言梧桐識佳樹蕙草留芳根地
古雲物在臺荒禾黍繁我來酌清波於此樹名園
功成拂衣去歸入武陵源王荆公詩云我名公字
偶相同我屋公墩在眼中公去我來墩屬我不應
墩姓尚隨公

桃花塢

在蔣山寶公塔之西北舊有桃花甚盛今不復存

方山埭

建康實錄吳赤烏八年使校尉陳勳發屯田兵於
方山南截淮立埭號方山埭又按南史湖孰縣方

山埭高峻冬月行旅以爲難齊明帝使沈瑀修之
瑀乃開四洪斷行客就作三日便辦其埭今去城
四十五里

雞鳴埭

建康實錄青溪有橋名募士橋橋西南過溝有埭
名雞鳴埭齊武帝早遊鍾山射雉至此雞始鳴圖
經云今在青溪西南潮溝之上又按南史齊武帝
永明中數遊幸諸苑載宮人從車宮內深隱不聞
端門鼓漏聲置鐘景陽樓上應五鼓及三鼓宮人
聞鐘聲竝早起裝飾帝數幸琅琊城宮人常從早
發至湖北埭雞始鳴故呼爲雞鳴埭若爾其埭又
當近北父老傳曰今清化市真武廟側是其處也

二塚恐皆當時所歷姑兩存之

射雉場

圖經云在縣東二十里齊東昏侯置射雉場五百所皆以七寶裝翳楊修之有詩云外作禽荒內色荒三千紅粉日嚴妝潘妃縱有嫣然態不步金蓮到射場

絕地

圖經云在縣南三里古大社西有凶地三畝晉周顛司馬秀蘇峻皆宅於此悉以禍敗宋王僧綽曰大丈夫當以正道自居何宅之有凶吉尋爲元凶所害場修之有詩云四主衣冠不令終高門列戟謾重重由來屠沃分勞逸莫道人凶非宅凶

鑄劍坑

圖經云在溧陽縣南八十里石屋山之西舊經云昔吳王使歐冶子鑄劍於此

六朝事迹編類卷之六終

光祿寺署正上元李濱古漁重校刊

六朝事迹編類卷之七

左奉議郎充江南東路安撫司幹辦公事張敦頤養正撰

宅舍門

孔子巷

輿地志云孔子廟在樂遊苑東隔青溪本奉聖亭侯所奉之廟也舊在溪南丹陽郡之東南本東晉所立中廢宋元嘉十九年詔復孔子廟至齊遷於今處以舊地為浮圖今名孔子寺亦名孔子巷在城東南五里古長樂橋東

言偃里

史記孔子弟子列傳言偃字子游吳人今不知其里所在或云在城東二十二里

四學

南史宋文帝元嘉十五年立儒學館於雞籠山命雷次宗居之明年丹陽尹何尚之立玄素學著作佐郎何承天立史學司徒參軍謝立立文學各聚門徒多就業者江左風俗於斯美焉

諸葛恪宅

圖經云在縣東二里古元風觀前南接青溪里俗傳云在今縣東南百餘步面對青溪其東即江令宅也

陸機宅

建康實錄云陸機入洛作懷舊居賦云望東城之紆徐邈吾廬之延伫李太白題王處士水亭云齊

朝南苑是陸機宅其詩云王子耽立言賢豪多在門好鵝尋道士愛竹嘯名園樹色老荒苑池光蕩華軒北堂見明月更憶陸平原掃地青玉簟為余置金尊醉罷欲歸去花枝宿鳥喧何時復來此再得洗囂煩圖經云在縣南五里秦淮之側

杜姥宅

建康實錄晉成帝恭皇后杜氏母裴氏即杜宏治之妻也裴氏名穆孝武帝封為廣德君初穆渡江宅於南掖門外時裴氏壽考故呼為杜姥圖經云在舊縣東北三里舊縣在冶城今天慶觀之東是也其宅未詳所在

劉子珪宅

南史齊劉瓛字子珪居於檀橋瓦屋數間上皆穿漏永平七年竟陵王子良表武帝爲立館帝以揚烈橋故主地給之檀橋在今縣東二十五里青龍山之前

沈約宅

南史梁沈約遷尚書令雖名位隆重而居處儉素立宅東田瞻望郊阜嘗爲郊居賦以敘其事東田在鍾山之下也

朱异宅

南史梁朱异及諸子自潮溝列宅至青溪其中有臺池玩好每暇日與賓客遊焉

孫瑒宅

寶章閣藏版

建康實錄陳起部尚書孫瑒居處奢豪宅在青溪東西即江總宅瑒家庭穿築極林泉之致歌童舞女當世罕儔

江令宅

陳尚書令江總宅也建康實錄及楊修之詩注云南朝鼎族多夾青溪江令宅尤占勝地後主嘗幸其宅呼爲狎客劉禹錫詩云南朝詞臣北朝客歸來惟見秦淮碧池臺竹樹三畝餘至今人道江家宅今城東段大夫約之宅正臨青溪即其地也故王荆公詩云昔時江令宅今日段侯家此可驗也

宋齊丘宅

舊傳在鎮淮橋之北御街之東今南北較務是也

其後又為南唐國子監

烏衣巷

王謝金陵人世以航海為業一日海中失船泛一木登岸見一翁一嫗皆衣阜引謝至所居乃烏衣國也以女妻之既久謝思歸復乘雲軒泛海至其家有二燕棲於梁上謝以手招之即飛來臂上取片紙書小詩繫於燕尾曰誤到華胥國裏來玉人終日苦憐才雲軒飄出無消息灑淚臨風幾百回來春燕又飛來謝身上有詩云昔日相逢冥數合如今睽違是生離來春縱有相思字三月天南無鴈飛至今歲竟不至因目謝所居為烏衣巷劉禹錫有詩曰朱雀橋邊野草花烏衣巷口夕陽斜舊

寶章閣藏版

時王謝堂前燕飛入尋常百姓家此見撫遺圖經云在縣東南四里晉書王導紀瞻宅皆在此巷

扶南樂署

建康實錄吳赤烏七年扶南國獻樂人於此置舍以教宮人在縣北二里

乘黃署

輿地志云在東府之西北五輅及朝車凡駕馬者之所去縣東北六里

銅螭署

臺城刻漏署西本洛陽之舊物宋平姚秦遷於此魏明帝為太子時玩以玉手板刺螭口中因入不出後人常見白螭涎在其中梁元帝移之江陵此

後遂不復見揚修之有詩云挈壺傳箭逼天聰鑄
出蟠螭巧範同何事腹中藏怪物人驚蠅螟氣如
虹

錦署

圖經云在縣東南十里宋遷百工於此也揚修之
有詩云人衣縑縷地衣紅不念家家杼柚空厥篚
織文應歲貢更翻新樣集機工

紙官署

輿地志宋永初中舊立齊高帝於此造銀光紙以
賜王僧虔在縣東一十五里

焚衣街

齊東昏侯自製服爲四種冠五私袍一月中二十

寶章閣藏版

餘出晨出三更歸夜出清晨返梁自襄陽出師廢
之焚奢淫服六十二種於御街中揚修之有詩云
雉頭金縷又珠胎煙緒香雲晝不開御路傍人皆
歎息逡巡紅焰作青灰

六朝事迹編類卷之七終

光祿寺署正上元李濱古漁重校刊

六朝事迹編類卷之八

左奉議郎充江南東路安撫司幹辦公事張敦頤養正撰

識記門

三斷石

吳後主天冊元年掘地得銀長一尺廣三分刻上有年月字又於吳郡臨平湖邊得一石石中有一小石青白色長四寸廣二寸刻上作皇帝字於是改元天璽遂立石紀吳功德按建康實錄云縣南三十里西接牛頭山丹陽雲巖東路有大碣石長二丈折為三斷此紀功之碑也今移在府治中可辨者二百餘字漫滅者五十餘字楊修之有詩云孫吳紀德舊刊碑埋沒蟠螭與伏龜惆悵石岡三

斷在至今猶似鼎分時

石印

天璽元年歷陽山石文理成字凡二十三云楚九州
渚吳九州都揚州士作天子四世治太平始江表
傳云歷陽縣有石山臨水高百丈其三十丈所有
七穿駢羅穿中色黃赤與本體不同俗傳謂之石
印又云石印封發天下當太平下有祠屋巫祝言
石印神有三郎時歷陽長表上言石印發皓遣使
以太牢祭歷山巫言石印三郎說天下方太平使
者作高梯上看印文詐以朱書石作二十字還以
啟皓皓大喜曰吳當為九州作都渚乎從大皇帝
逮孤四世矣太平之主非孤復誰重遣使以印綬

寶章閣藏版

拜三郎為王又刻石立銘褒讚靈德以答休祥此
見吳志注

石室

吳興陽羨山有空石長十餘丈名曰石室在所表
為大瑞皓乃遣兼司徒董朝兼太常周處至陽羨
縣封禪國山明年改元天紀大赦以應石文

潛鶴鼓

臺城端門上二鼓初得於會稽雷門傳是越王舊
物擊之聲聞洛陽後孫恩亂兵擊破中有二鶴沖
天而去自是不復鳴後人呼為潛鶴鼓楊修之有
詩云端門擊破使人驚潛鶴雙飛上玉清怪得舊
時聲太遠沖天合自九臯鳴

獨足臺

陳末時有一鳥獨足飛上宮城臺上以觜畫地云獨足上高臺盛草化為灰欲知我家處朱門當水開解者以為獨足指後主獨行無眾盛草言荒穢隋承火運草得火而灰及國破隋煬帝館於都水臺所謂上高臺當水開也揚修之有詩云鳥跡分明在帝臺管絃聲裏輒書來回頭一覺風流夢猶得朱門傍水開

寶公銅牌記

按高僧傳公諱寶誌宋元嘉中現形於東陽鎮古木鷹巢中朱氏聞巢中兒啼遂收育之因以朱為姓施宅為寺公自少出家依於鍾山道林有銅牌

寶章閣藏版

記多識未來事云有一真人在冀州開口張弓在左邊子子孫孫萬萬年江南中主名其子曰弘冀錢鏐諸子亦皆連弘字以應之而國朝宣祖諱乃正當之

秦淮石誌

南唐保大中浚秦淮得石誌按其刻有大宋乾德四年凡六字他字磨滅不可識令諸儒參驗乃輔公祐反江東時年號太祖受命國號宋改元乾德江左始衰弱豈非威令將及而符讖先著也

天水碧

南唐末時前數年宮人接薔薇水染生帛一夕忘收為濃露所漬色倍鮮翠因令染坊染必經宿露

之號爲天水碧宮中競服之識者以爲天水趙之望也

六朝事迹編類卷之八終

光祿寺署正上元李濱古漁重校刊

六朝事迹編類卷之九

左奉議郎充江南東路安撫司幹辦公事張敦頤養正撰

靈異門

新洲

南史宋武帝伐荻新洲見大蛇長數丈射之明日復至洲裏聞有杵臼聲往覘之童子數人皆青衣於榛中擣藥問其故答曰王爲劉寄奴所射合散傅之帝曰王神何不殺之答曰寄奴王者不可殺帝叱之皆散收藥而反今薛家洲蓋其地也屬金陵鄉去城北四十里

八功德水

蔣山悟真菴後接梅摯亭記梁天監中有胡僧曇

隱寓錫於此山中乏水時有龐眉叟相謂曰予山龍也知師渴飲措之無難俄而一沼沸成後有西僧繼至云本域八池已失其一似竭彼盈此也其泉一清二冷三香四柔五甘六淨七不鑿八蠲疴故名八功德水自梁已前嘗取給御廚又按楊修之詩注云高僧曇隱遊行於此忽聞金石絲竹之音俄見清泉一泓瑩徹甘滑有積年疾者飲之皆愈

誌公鱠殘魚

高僧傳寶誌嘗對梁武帝食鱠帝曰朕不知此味二十餘年師何為爾誌乃吐出小魚鱗尾依然今金陵尚有鱠殘魚

郗氏化蛇

郗氏梁武帝皇后也崩數月帝常追悼之晝則忽忽不樂宵乃耿耿不寐居寢殿聞外騷宰蘇骨切勃宰切出聲視之乃一蟒盤躡上殿睽式冉切說文睽張香牙切口以向於帝帝大驚駭無所逃匿不得已蹶然而起謂蛇曰朕宮殿嚴警非爾蛇類所生之處必其妖孽欲崇朕邪蛇為人語啟帝曰蟒則昔之郗氏也妾以生存嫉妒六宮其性慘毒怒一發則火熾矢射損物害人死以是罪謫為蟒耳無飲食可實口無窟穴可庇身飢窘困迫力不自勝又鱗甲有蟲啞子合切啞玉狡切肌肉痛苦甚劇若加錐刀焉蟒非常蛇亦復變化而至不以皇居深重

爲阻耳感帝平昔眷妾之厚故託醜形陳露於帝
祈一功德以見拯拔也帝聞之嗚呼感激旣而求
蟒遂不復見帝明日大集沙門於殿庭宣其由問
善之最以贖其苦誌公對曰非禮佛懺條悃款不
可帝乃然其言搜索佛經錄其名號兼親杼睿思
灑聖翰撰悔文共成十卷皆采摭佛語削去閒詞
爲其懺禮又一日聞宮室內異香馥郁良久轉美
初不知所來帝因仰視乃見一天人容儀端麗謂
帝曰此則蟒後身也蒙帝功德已得生忉利今呈
本身以爲明驗也慙懃致謝言訖而去此見梁武
懺序

燕雀湖

寶章閣藏版

輿地志云走馬橋見有燕雀湖窮神秘苑曰梁昭
明太子在東宮有一琉璃盃紫玉杯皆武帝所賜
也旣薨詔置梓宮後更葬開墳爲闈人攜入大航
乃有燕雀數萬擊之因爲有司所縛乃獲二寶器
帝聞而驚異詔以賜太孫封墳之際復有燕雀數
萬銜土以增其上墳側今有湖後人因名燕雀湖
楊修之有詩云平湖岸側見高墳萬土銜來燕雀
羣鑑面無波天一色此中文藻似諸君在城東四
里下入青溪

生人蓐

南史梁阮孝緒字士宗母王氏有疾合藥須得生
人蓐舊傳鍾山所出孝緒躬歷幽險累日不逢忽

一鹿前行隨後至一所遂滅就視其處果獲此草
今山中不復有之

木醴

建康實錄陳後主禎明二年初覆舟山及松柏林
冬月出木醴後主以為甘露之瑞俗呼為雀錫舊
立甘露亭今廢

牝狙觸網

按湘山野錄云南唐李後主獵青龍山一牝狙觸
網見主兩淚稽顙屈指其腹主戒虞人保守之是
夕誕二子還幸大理寺親錄囚繫一大辟婦以孕
在獄未幾誕二子煜感牝狙之事罪止於流其山
去城二十五里

感龍產鯉

昔民有女感黑龍於田野歸而有娠後產鯉魚投
於水中復能變化隨母所出入後成龍而去母亡
每春時必來墳所鄉人懼之因立廟祠焉謂之烏
鯉廟在溧水縣東南二十五里

六朝事迹編類卷之九終

光祿寺署正上元李濱古漁重校刊

六朝事迹編類卷之十

左奉議郎充江南東路安撫司幹辦章張敦頤養正撰

神仙門

白都山

昔白仲都常於此學道白日上昇因以為名揚修之有詩云駕鶴驂鸞自古聞策名仙籍是真君天邊舊迹無尋處滿目青山空白雲在城西南八十里西臨大江

茅君山

茅蒙字初成華陽人也隱華山修道秦始皇三十年白日上昇是時先有民謠曰神仙得者茅初成駕龍上昇入太清時下立洲戲赤城繼世而往

在我盈始皇聞之問故老曰此仙謠也於是有尋
仙之意蒙之立孫盈得道於金陵句曲山上昇為
東嶽上卿司命真君太元真人居赤城時來句曲
邦人改句曲為茅君山事見撫遺圖經云漢時有三茅
君各乘一白鶴來居其上故號為三茅君世傳茅
盈茅固茅震皆蒙之後也山在句容縣東南四十
五里華山華陽皆在句容縣荆公有詩云一峯高出眾山巔
疑隔塵沙道里千俯視烟雲來不極仰攀蘿葛去
無前人間已換嘉平帝地下誰通句曲天陳迹是
非分草莽紛紛流俗尚師仙

仙杏山

舊經云絕頂有杏林及仙人腳跡因以名之又有

仙壇石井故一名仙壇石山唐垂拱五年重修壇
三所并石井聖曆二年縣令岑仲琢石為像設香
燈供祀之下有清泉流入丹陽湖在溧水縣東南
四十三里

石城洞

石頭城西嶺下南臨大江有洞宛然按真誥云此
小有洞天之南門也

華陽洞

舊經云即第八金壇大洞天也唐改為太平觀在
句容縣東南四十里茅山之側

仙人臺

幕府山之西有石棋盤說者云舊有仙人對奕於

此故徐君平幕府山詩云仙去棋枰草自繁即此地也去城北二十五里

靜壇

舊經云梁侍中周捨立與道士塢相對武帝問曰其壇如何對曰風不鳴條雲無膚寸鹿巾黃帔其數甚多白簡朱衣其來罕至因名曰靜壇今按道士塢在蔣山古明慶寺前與八功德水相近則靜壇當在其處

春澗

鍾山宋興寺東梁處士劉訐字彥度隱居之所楊修之有詩云手拖葛屨坐藜牀竹樹蕭然一水傍枕上白雲船下月卜鄰東澗勝東岡

寶章閣藏版

道士塢

蔣山明慶寺前乃陳宣帝禮元靖先生臧兢處今在寶公塔之東

華陽宮

舊經云張真人煉丹之所也梁朝陶隱居立爲華陽上館唐天寶七年改今額

鷲洞宮

舊經云梁普通三年晉陵縣女子錢妙真幼年於此修行誦黃庭經積功三十年道成佩白練飛入洞中有石室醮壇存焉天寶七年奉敕於錢真人昇仙之所建宮度女道士洞在宮東一百餘步

洞元觀

輿地志云赤鳥二年吳大帝為仙公葛立造立後
白日上昇山上至今猶有壇宇楊修之有詩云葛
立功行滿三千白日驂鸞上碧天留得舊時壇宇
在後人方信有神仙觀在方山下去城四十五里

青元觀

舊經云本吳朝葛仙公宅也梁天監七年建有一
丹井在祠宇前去句容縣西南三百餘步

玉晨觀

句容縣東南四十五里句曲洞北門之側舊經云
本晉許長史宅也昔高辛時展上公秦時巴陵侯
後漢時杜廣平竝於此學道得仙梁武帝天監十
三年陶弘景奏請立為朱陽館唐正觀中為紫微

國師王先生改為華陽宮天寶七年為立靖先生
改紫陽觀前有郭真人養龍池醮壇丹井俱在大
中祥符中奉勅改今額曰玉晨觀

太平觀

梁書云陶弘景讀書萬餘卷善琴棋為諸王侍讀
永明十年脫朝服挂神武門上表辭祿詔許之於
是止於句容之句曲山曰此是第八洞宮名金壇
華陽之天乃立館自號華陽陶隱居唐正觀九年
為昇真先生改為太平觀

尋仙觀

梁時所造也與芝山鷲洞相鄰上有石壇舊經云
昔茅君行道之所唐垂拱五年道士宋文幹因石

琢像董工修壇焉在溧水縣東南六十里

太虛觀

太虛

舊經云東晉時李盤白遇仙於此修道白日上昇
山頂有會仙亭唐開元五年建大中祥符元年九
月奉勅改今額在溧陽西南四十里盤白山下初
名招仙觀

六朝事迹編類卷之十終

光祿寺署正上元李濱古漁重校刊

